



Publicaziuns dalla vischnaunca, jamna 47

Votaziuns federalas e communalas dils 28 da november 2021

L'urna principala en casa communal a ei aviarta sco suonda:

Dumengia, ils 28-11-2021 9.00–11.00

La documentaziun da votar duess mintga votant/a haver obteniu. Cass cuntrari san ins s'annunziar immediat, denton **sil pli tard entochen venderdis, ils 26 da november 2021, allas 17.00**, tier l'administraziun communal (tel. 081 920 36 36).

Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/ella observar il suandont:

1. Emplenir ora ils cedels da votar a maun e metter quels en la cuviarta da votar grisch a **serrar giu** ella.
2. Metter la cuviarta da votar grisch ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (supplicau da francar) ni directamein fierer en la scaffa da brev dalla casa communal. Ils cedels da votar ston esser sil pli tard la dumengia, ils 28 da november 2021, allas 11.00 tier l'administraziun communal.

Aschinavon ch'ei vegn buca risguardau sura instrucziuns da votar, ein ils cedels da votar nunvaleivels.

Suprastonza communal

Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2021-1057.000

Marcus Josef Schnoz, Mettlenstrasse 12, 8135 Langnau am Albis; construcziun d'in niev tanc per las auas tschuffas e niev indrez da gas, parcella 3287, edifeci 624A, Mises Las Cavorgias, 7183 Mumpé Medel.

Nr. 2021-1073.000

Willi Huonder-Giossi, Via Glaretsch 14, 7186 Segnas; construcziun d'ina remisa per deponer utensils/material, parcella 15, Via Peisel 1, 7186 Segnas.

Disentis/Mustér, ils 26 da november 2021

Uffeci da baghegiar Disentis/Mustér

Annunzias da baghegiar

All'istanza da baghegiar ein sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziou suandonts projects:

2021-2092.000

Paolo Camponovo, Via Serenella 31, 6976 Castagnola; construcziun d'ina seiv per la protecziun dallas plontinas, parcella 3640, Via Plauncas 4, 7180 Disentis/Mustér.

2021-2100.000

Edwin Deflorin-Rainolter, Gassa da Cuoz 21, 7186 Segnas; sanaziun dil tetg-casa, parcella 1216, Gassa da Cuoz 21, 7186 Segnas.

2021-2102.000

Severin Lutz, Via Sorts 9, 7162 Tavanasa; sanaziun dil depot da lenna, parcella 2882, Raveras, 7180 Disentis/Mustér.



2021-2103.000

Alex Albrecht-Printz, Via Cons 7, 7180 Disentis/Mustér; sanaziun dil tetg existent dil baghetg annex nr. 128B-A, Via Cons 7, 7180 Disentis/Mustér

2021-2104.000

Huonder GmbH, Via Fontauna 4, 7180 Disentis/Mustér; suttetg provisorii pil temps d'unviern, parcella 3852, Via Raveras 41, 7180 Disentis/Mustér.

Disentis/Mustér, ils 26-11-2021

Uffeci da baghegiar Disentis/Mustér

Cussegl da vischnaunca

Rapport dalla seduta diils 19 da november 2021

Venderdis, ils 19 da november 2021 ha giu liug ellan halla Cons l'otgavla seduta dil cussegl da vischnaunca dalla perioda d'uffeci 2021/2024. El center dalla seduta ei stau il preventiv 2022. Il cussegl da vischnaunca ha approbau il preventiv 2022 e fixau pigl onn 2022 il pei da taglia per la taglia sin schischom ad 1,7‰ (sco tochen dacheu). Plinavon ha il cussegl da vischnaunca inoltrau ina moziun concernent il luf.

Il cussegl da vischnaunca ha sut l'egida dil vicepresidente dil cussegl da vischnaunca Adrian Deflorin approbau il preventiv 2022. Il preventiv 2022 dil quen da gudogn e sperdita siara cun in surpli da recavs (gudogn) da frs. 329 600.–. Igl ei previu che las expensas totalas sereduceschien en cumparegliaziun cul preventiv precedent per rodund 2,3% e las entradas per rodund 1,8%. Avon in onn ei vegniu quintau cun in gudogn da frs. 255 100.–. Plinavon quenta la suprastonza communal 2022 cun in'atgna finanziaziun (cash-flow) da frs. 1 065 600.– (preventiv 2021: 956 600.–) ed investiziuns nettas da frs. 7 773 000.– (preventiv 2021: 5 972 700.–). Pigl onn 2022 ei vegniu fixau il pei da taglia per la taglia sin schischom ad 1,7‰. Il preventiv 2022 vegn suttamess al referendum facultativ conform ad art. 21, lit. a dalla costituziun communal.

Ultra da quei ha il cussegl da vischnaunca sut il presidi da Giusep Lozza inoltrau ina moziun che pretenda da sclarir cul cantun Grischun pusseivladads per la protecziun dil carstgaun e d'animals encunter il luf. Ils 11 da november 2021 ei il luf staus d'observar durant il di el vischinadi d'Acletta sper la piazza da termagliar dil vitg da vacanzas Reka, in liug fetg datier da differentas purschidas per affons e famiglias. Tenor regulativ da fatschentas dalla vischnaunca da Mustér sto la moziun vegnir tractada dil cussegl da vischnaunca enteifer miez onn dapi ch'ella ei vegnida inoltrada.

Suprastonza communal

Referendum facultativ

A caschun da sia seduta diils 19 da november 2021 ha il cussegl da vischnaunca approbau cun 12 encunter 1 vusch (neginas abstenziuns) il preventiv 2022.

Conform ad art. 21 lit. a dalla costituziun communal ei quella decisiun suttamessa al referendum facultativ. Il messadi tiel preventiv 2022 (incl. annexas) ei exponius per investa en casa communal (stanza nr. 10). Enteifer 20 dis dapi la publicaziun officiala han 80 votantas e votants la pusseivladad d'inoltrar enviars sura conclus il referendum e pretender ina votaziun dil pievel.

Suprastonza communal



Temps d'unviern

Restricziuns da carrar e mesiras da segirtad

Vias forestalas e funsilas

Duront igl unviern eis ei scumandau da carrar cun tuts vehichels sin las vias forestalas e funsilas. Quei scamond vala mintgamai naven digl'emprem da december entochen la fin mars, respectivamein naven dil mument che las vias ein cuvretgas cun neiv. Fullar via (rumir vias) ei scumandau (art. 10 dil reglament da traffic).

Sendas da viandar d'unviern e sendas da gianellas

Las sendas da viandar d'unviern sco era las sendas da gianellas (marcadas rosa) vegnan pridas en funcziun e mantenidas naven digl 1. da december 2021 entochen miez d'avrel 2022. Il bandunar sendas da viandar d'unviern e rutas da gianellas signalisadas ni vias rumidas da neiv e tut semover ordeifer la zona da baghegiar succeda sin atgna responsabladad. Serradas da sendas, rutas e vias ein ligiontas per tuts e ston vegnir observadas (art. 6 e 10 dalla lescha davart l'organisaziun en cass da crisa).

Naven dall'entschatta december vegn il stan actual davart l'avertura da sendas da viandar d'unviern e sendas da gianellas communicaus silla pagina d'internet www.disentis.ch/strassen.

Nus supplichein da prender enconuschientscha da questas directivas e giavischein in bi temps d'unviern. Bien engraziament per la capientscha ed observaziun.

Disentis/Mustér, ils 26 da november 2021
Direcziun communal Disentis/Mustér

Nominaziuns pil Premi Desertina 2022

Nus envidein vischinas e vischins sco era uniuns ed instituziuns d'inoltrar propostas per nominaziuns e d'indicar quellas entochen **gliendisdis, ils 20 da december 2021**, alla presidenta dalla cumissiun, geraua Iris Lombris, Via Dulezi 6, 7180 Disentis/Mustér. Las propostas san era vegnir annunziadas via posta electronica all'adressa: educaziun@disentis.ch.

Premiai vegnan personas privatas sco era instituziuns ed organisaziuns. Ils undrai ston esser domiciliai en vischnaunca ni haver ina relaziun speciala cun la vischnaunca.

Ulteriurs sclariments sur dil Premi Desertina anfleis Vus sut: www.disentis.ch/sport/temps_liber/cultura_ni_servis/spurtegl_virtual/leschas/300_reglament_Premi_Desertina.

Cumissiun Premi Desertina



Pigniel da Nadal 2021

Il menaschi tecnic dalla vischnaunca da Mustér organischescha uonn la vendita da pigneuls da Nadal. Ei vegn vendiu pignola mo sin empustaziun. Il pigniel sa vegnir retratgs ils 22 da december 2021 naven dallas 9.00–14.00 avon il luvratori dil menaschi tecnic a Cuoz. Sin giavisch e per in prezi surpli da frs. 5.– vegn il pigniel era furnius avon casa. Il pigniel sa vegnir empustaus cul talun aschuntau **entochen ils 10 da december 2021:**

Adressa:

Uffeci forestal Disentis/Mustér

Caum postal 57, 7180 Disentis/Mustér

telefon: 081 920 36 36

e-mail: uflepp@disentis.ch

Bien engraziament



Talun d'empustaziun

Num:.....

Prenum:.....

Adressa:.....

Telefon:.....

Pégn (Rottanne)

1.10–1.50 m / frs. 26.– tocs

1.60–2.00 m / frs. 29.– tocs

2.10–2.50 m / frs. 33.– tocs

Pégn da Nordmann

1.10–1.50 m / frs. 41.– tocs

1.60–2.00 m / frs. 56.– tocs

2.10–2.50 m / frs. 78.– tocs

Pinar sez il pigniel da Nadal!

Igl uffeci forestal dat era uonn la pusseivladad a mintga habitont ni hosp da Mustér dad ir egl uaul a pinar gratuitamein il pigniel da Nadal giavischau. Il selvicultur communal accumpogna ils interessai e dat in ni l'auter cussegl. Nus s'entupei cun resti cauld, buns calzers ed in resgiut:

gievgia, ils 23 da december 2021, allas 9.30 Il liug da sentupada vegn publicaus quater dis avon sut www.disentis.ch/uaul

Tagliar pignola en uauls da schurmetg, plontaziuns sco era ord seivs da schurmetg ei scumandau! Per sclariment stat il selvicultur Simon Cathomen bugen a disposiziun.

Uffeci forestal Disentis/Mustér



Seivs mobilas per la pasculaziun

Tenor art. 75, al. 1 dalla lescha da baghegiar ed art. 18 al. 1 dalla lescha d'agricultura ston tuttas seivs mobilas vegnir allontanadas **sil pli tard treis dis** suenter la pasculaziun. Quei vala era per seivs da gatter. Las seivs buc allontanadas vegnan pridas naven senza avisar ils pertuccai sin donn e cuost dil proprietari da terren.

Nus supplichein da prender enconuschientscha da quei fatg e d'instradar las mesiras prescettas.

Disentis/Mustér, november 2021

Uffeci da baghegiar ed infrastruttura

Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica.

Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu).

Quellas lavurs ston esser finidas sil pli tard entochen la **fin da november 2021**. En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietaris.

Disentis/Mustér, november 2021

Uffeci da baghegiar ed infrastruttura Disentis/Mustér

Niev scolast el team dalla primara naven digl onn da scola 2022/23

Il cussegl da scola Mustér ha eligiù Sandro Tomaschett sco nova persuna d'instrucziun per la 5. Classa primara naven digl onn da scola **2022/23**. Sandro Tomaschett instruescha dapresent alla scola primara a Sedrun. El ei sesents a Segnas e s'engascha dapi plirs onns en differents secturs da nossa vischnaunca.

Il cussegl da scola ed il meinascola ein fetg cuntents e satisfatgs dall'elecziun e selegran sin ina buna, constructiva e fritgeivla collaboraziun.

Biblioteca populara Disentis/Mustér e contuorn

Drovas ti aunc in schenghetg da Nadal?

Vul ti pixlar in portaclavs ni ina carta da Nadal en cumpignia e tedlar ina historia? Cun pintga tocca da tuttas colurs sas ti pixlar in portaclavs suenter tiu gust.

Mesjamna, ils 1-12-2021, dallas 14.00–16.00,

sonda, ils 5-12-2021, dallas 9.30–11.30

Nua: en biblioteca a Mustér

Cuosts pil material: Il material cuosta. Per affons naven da siat onns.

Il diember da participonts ei limitaus. Ina annunzia tochen gievgia da miezdi avon il termin dall'occorrenza ei necessaria: biblioteca@disentis.ch.

Nus selegrein sin tei.

Il team dalla Biblioteca populara Disentis/Mustér e contuorn



Finiastras d'Advent 2021 a Segnas/Cuoz

Cun plascher astgein nus presentar nossas finiastras d'Advent a Segnas e Cuoz. Tier la scola a Segnas penda ina carta cun indicau, nua che las finiastras sesanflan. Quella carta ei era publicada sin la pagina d'internet dalla vischnaunca da Mustér (sut «actualitads»). Las finiastras ein mintgamai marcadadas cun ina steila. In grond engraziel fetg admettein a tuts e tuttas che han priu peda da preparar ina finiastra d'Advent.

Suandontas finiastras arvan dumengia, ils 28 da november 2021:

- Stefi Albrecht
- Claudia Berther
- Pierino Bisquolm
- Darinka Cajacob
- Barbara Candinas
- Judith Cathomen
- Rosmarie Duff*)
- Sonja Durschei
- Carla Flury e Daniela Deflorin (Val da Cuoz)
- Rosmarie Fry
- Regina Giger
- Hof Glaretsch
- Nelly Huonder
- Bettina Jacomet
- Helen Lutz
- Toja Maissen Berther
- Christina Monn
- Nadja Schmed
- Isabel Sialm

*) Pign stan da vendita sper la finiastra d'Advent. Il recav va cumpleinamein en favur dalla Unicef per affons en Brasilia («Sternenwochen»).

Nus giavischein a tuts visitaders bia plascher da contemplar nossas finiastras ed a tuts in bi temps d'Advent.

Salids Helen e Judith

Sontgaclau 2021

Sonda, ils 4 da december 2021 viseta il Sontgaclau e ses fumegls puspei nies vitg. El assista al survetsch divin en baselgia sogn Gions e vegn silsuentar era ad esser presents sil plaz avon halla Cons, nua ch'ei dat in pign apero, tiel qual in e scadin ei cordialmein envidaus. Silsuentar vegn el a serender sin via e visitar ils affons ellas casadas ni tenor giavisch, sin fundament dil svilup da Covid-19, avon casa

Bugen essan nus contonschibels per invitaziuns ed informaziuns sut sontgaclauvitg@hotmail.com.

Nus selegrein da Vossa participaziun en favur da nossa tradiziun.



Sontgaclau a Segnas ed Acletta

Sontgaclau viseta **ils 4 da december 2021** las famiglias da Segnas-Acletta. Muort Corona ughegia Sontgaclau denton aunc buca d'ir ellas casadas. Aschia envida Sontgaclau cordialmein las famiglias da Segnas da vegnir tier ils Sialms e las famiglias d'Acletta da vegnir tier la caplutta. Ei vegn a dar in termin persunal per mintga famiglia. Dasperas repartan ils gidonters dil Sontgaclau empau petta e punsch. ils organisaturs ein engrazieivels, sche vus tarmetteis gia ordavon enqual cavazzin sur dils presents, en special sur dils affons entochen ils 1-12- 2021 a ugsegnasacletta@gmail.com. Per plascher aschuntar ina numera da telefonin.

Igl oremus vegn prelegius sonda, la sera da Sontgaclau, ils 4 da december 2021, allas 21.00 avon la caplutta ad Acletta ed allas 21.00 tier ils Sialms a Segnas.

Ei fagess grond plascher al Sontgaclau da far in viva cun vus!

Cordial engraziament

Uniun da giuventetgna Segnas-Acletta

Uniun da dunnas Disentis/Mustér

Sentupada cun Sontgaclau

La gruppa dil ressort affons envida tut ils affons entochen quater onns ensemen cun lur mummas ni era babs e fargliuns ad ina sentupada comunabla cun il Sontgaclau giu Madernal/Pardomat. Suentar la viseta dat ei aunc in sitg cauld.

Datum: **Gievgia, ils 2 da december 2021**

Sentupada: allas 14.00 a Madernal/Pardomat

L'occurrenza cuosta.

Annunzias: entochen ils 30 da november tier Sarah Huonder, 079 265 42 92 ni Sonja Muscas, 079 681 58 66

Uniun da dunnas, ressort affons

Apparat d'udida

Gliendisdis, ils 6 da december 2021 saveis Vus schar schubergiar e rugalar Vies apparat d'udida:

9.15–10.30 en Casa sogn Martin a Trun

11.00–11.45 en Casa sogn Giusep a Cumpadials

13.15–14.30 el Puntreis, Center da sanadad a Mustér

Dunna Giger dalla firma Amplifon e signur Gfeller dalla firma sorprendan comunablamein quei survetsch gratuit per tuts interessents.

Ei drova negina annunzia.
